

ԼԵՀԱՀԱՅՈՑ ԳԱՂԹԸ ԵՒ ՆԵՐՔԻՆ ԿԵԱՆՔԸ

Գրեց՝ Յ. ՉԱՒՐԵԱՆ

IV

ԿՐՕՆԱԿԱՆ ՊԱՅՔԱՐ ԵՒ ՄԻՈՒԹԻՒՆ

ԿԱԹՈՂԻԿ ԵԿԵՂԵՅՈՒ ՀԵՏ

Եւ ահա այս մեծ յաջողութիւններէ շրջանում լեհահայերի գլխին սկսում են կուտակուել սեւ ամպեր, որոնք իսպառ կործանեցին նրանց բոլոր նուաճումները, իջեցրին նրանց նիւթական ու մտաւոր մակարդակը եւ բոլորովին դիմազուրկ արին:

Այդ տեղի ունեցաւ ժ. Ղարբի առաջին կիսին, այն չարարախտ տարիներին, երբ Հայաստանը պատառ-պատառ էր լինում միմեանց հետ պատերազմող թիւրքերի եւ պարսիկների միջեւ: Շահ Աբաս Մեծի ժամանակաշրջանն էր:

Շահը մի կողմից աշխատում էր թիւրքերի եւ Պարսկաստանի միջեւ ստեղծել բնակչութիւնից զուրկ, ամայի մի տարածութիւն եւ դրանով կասեցնել թիւրքերի յառաջխաղացումը, միւս կողմից, ինչպէս պատկերաւոր ձեւով արտայայտում է արեւմտեան հայագէտներից մէկը,*) զուրկ սեփական երկրում դրամից եւ կանոնաւոր հիմքերի վրայ դրուած առեւտրից ու արդիւնաբերութիւնից՝ վճռեց այդ ամէնը կազմակերպել հայերի միջոցով՝ գաղթեցնելով Արաքսի հովտի հայութիւնը դէպի Պարսկաստանի ներսերը:

Ծանր փորձութիւնների էր ենթակայ այդ ժամանակ ե՛ւ էջմիածնի կաթողիկոսական աթոռը, որ բռնում էր Մեղքիսէթ կաթողիկոսը (1593-1624)՝ մի կամազուրկ եւ կասկածելի արժանիքների տէր մարդ: Նա երկու անգամ հրաժարուեց կաթողիկոսական կոչումից, առաւ մի քանի աթոռակիցներ, ըստ երեւոյթին, ոչ առանց նիւթական շահի եւ, վերջապէս, 1624 թուին ընդմիջտ թողեց էջմիա-

ծինը եւ մեկնեց Կ. Պոլիս, այստեղից էլ անցաւ Լեհաստան:

Լեհաստանում նա գտաւ եպիսկոպոսական աթոռը թափուր, Մեսրոպ եպիսկոպոսի մահից յետոյ (1623-1625): Լվովի գաղութը, որ ղեկավար դիրք ունէր լեհահայոց մէջ, եպիսկոպոսի ընտրութեան ժամանակ տատանւում էր ընդմէջ երկու թեկնածուների, որոնք ներկայացնում էին լվովցի երկու հարուստ եւ ազդեցիկ հայ ընտանիքներ՝ Հոլուբովիչ - Հորիչկաների եւ Թորոսովիչների:

Մեղքիսէթը, հակառակ որ հրաժարուած կաթողիկոս էր եւ, ըստ երեւոյթին, աթոռից հեռանալու պատճառով, կորցրել էր ընտրուած թեկնածուի եպիսկոպոսական պաշտօնը հաստատելու իրաւունքը, իր վրայ առաւ Լվովի եպիսկոպոս նշանակելու դերը եւ հարցը դրեց գործնական հողի վրայ՝ պահանջելով թեկնածուից բաւական խոշոր մի գումար՝ 2000 դուկատ: Թեկնածուները շատ երկար սակարկեցին նրա հետ, մինչեւ որ Նիկոլ Թորոսովիչը, մի երիտասարդ եւ եռանդուն մարդ*), դործը վերջացրեց Մեղքիսէթի հետ՝ տալով նրան մի համեմատարար փոքր գումար՝ 300 տալեր**):

Հայ համայնքը՝ իմանալով Թորոսովիչի ընտրութիւնը նախկին կաթողիկոսի կողմից եւ գտնելով, որ թեկնածու ընտրելու իր իրաւունքները ոտնահարուած են, բողոքեց եւ ար-

*) Մնուած 1605 թ., Լվովում: Յայտնի չէ թէ ո՞ւր է ստացել իր կրթութիւնը: Սարկաւազ ձեռնադրուած Պոլսում, Մեղքիսէթի Լվով գալու նախօրեակին:

**) Առաքել Դաւրիժեցու պատկերաւոր արտայայտութեամբ՝ «Կաթողիկոսն տեսնելով զյոլովութիւն առ ձեռն պատրաստ ոսկւոյն, նաեւ ակնկալութիւն եւս յոլովից ոսկւոյ առ յապայն, հաճեցաւ օրհնել զնիկողայոս եպիսկոպոս ի Լովայ»: Առաքել Դաւրիժեցի, էջ 364:

*) F. Macler, "Revue des Etudes Armeniennes", 1927.